

Kekchi - Kamk Santil Hu - Free from Death Scriptures

Romanos 6:23 Xb'aan naq li xtojb'al li maak a'an li kamk; ab'an li maatan li nachalk rik'in li Yos a'an li junelik yu'am sa' xk'ab'a' li Kristo Jesus, li Qaawa'.

Romanos 8:2 Xb'aan naq li xchaq'rab' li Musiq'ej li nak'ehok yu'am sa' xk'ab'a' li Kristo Jesus xatrach'ab' chiru xchaq'rab' li maak ut li kamk.

2 Timoteo 1:10 Li rusilal li Yos xk'utunk anaqwan rik'in li xk'utb'esinkil rib' laj Kolol qe, a' li Kristo Jesus, li xjuk'uk re xwankil li kamk ut xk'e chi lemtz'unk li junelik yu'am sa' xk'ab'a' li Chaab'il Esilal.

Job 5:2 Ka'ajwi' eb' li jip ut maak'a'eb' xna'leb' neke'kamk xb'aan xrahilaleb' malaj xkaqaleb' xch'ool.

Oseas 13:14 Ma tinkol tab'i' chiru li muqleb'aal kamenaq? Ma twisi tab'i' sa' ruq' li kamk? At kamk, b'ar wank laawankil? B'ar wank laatiq'leb', at muqleb'aal kamenaq? Ink'a' twil xtoq'ob'aal ru laj Efraín.

Salmos 9:14 At Qaawa', chawuxtaana wu, chawil taxaq li rahilal wankin wi' xb'aaneb' li xik' neke'ilok we; chinaawisi taxaq rub'el xwankil li kamk,

Job 6:26 Nekewe ch' rix li waatin. Ab'an xin'aatinak chi jo'kan, xb'aan naq maak'a' chik woyb'enihom; ut li waatin nak'ame'k xb'aan li iq'.

Job 33:22 Kamk qe, wanko chik sa' rokeb' aal li xna'ajeb' li kamenaq.

Ezequiel 37:12,13 Jo'kan naq aatinaheb' ut ye reheb': «Jo'ka'in xye li Qaawa': Ex intenamit, ok we chi xteeb'al eb' li muqleb'aal wankex wi', texwisi chisa' ut texink'am chaq wi' chik sa' xteepal Israel. 13 Ut naq akaq xinte leemuqleb'aal ut xexwisi chisa', ex intenamit, teenaw naq laa'in li Qaawa'.

Mateo 27:52 Kilaje'teliik eb' li muqleb'aal kamenaq, naab'aleb' li sant ak kamenaqeb' ke'wakliik chaq wi' chik chi yo'yo,

Génesis 2:7 Toja' naq li Qaawa' Yos kixyoob'tesi li winq rik'in xpojtz'il li ch'och'. Chi apunb'il kiroksi li xmusiq' sa' ru'uj, ut chi jo'kan li winq kiwank xyu'am.

Génesis 6:17 Laa'in tink'e jun nimla b'ut'iha' sa' xb'een li ruuchich'och' re xsachb'aleb' chixjunil li wankeb' xmusiq' junsut junrub'el choxa: chixjunileb' li wankeb' sa' ruuchich'och' te'oso'q.

Génesis 7:15 Ke'ok rochb'een laj Noé sa' li jukub' kab'l junq sumal li junjunq chi xul:

Génesis 7:22 Kilaje'kamk chixjunileb' li neke'musiq'an ut chixjunil li wank sa' ruuchich'och'.

Job 12:10 sa' ruq' li Qaawa' wank li xyu'am chixjunileb' li yo'yookeb'.

Job 33:4 Li Nimajwal Yos xyoob'tesink we, ut A'an ajwi' xk'ehok inyu'am.

Hechos 17:25 chi moko nak'anjelaak ru rik'in ruq'eb' li winq chanchan tawi'

junaq li wank sa' rajb'al ru: a'an b'an li nak'ehok re li qayu'am chiqajunilo, li qamusiq' ut chixjunil li k'a'aq re ru.

Apocalipsis 13:15 Kik'ehe'k xwankil chi xk'eeb'al xyu'am li xjalam u li josq' aj xul re naq taa'aatinaq ut tixk'eheb' chi kamk jo'k'ihaleb' li ink'a' te'loq'oninq re li xul.

Juan 10:10 "Laj elq' ka'ajwi' elq'ak, kamsink ut sachok naraj naq nachalk. Laa'in xinchalk re naq te'wanq xyu'am ut taawanq chi numtajenaq.

Isaías 28:15 Laa'ex nekeye: "Xqak'e qib' sa' aatin rik'in li kamk, xqab'aanu jun sumwank rik'in li xna'ajeb' li kamenaq. Jo'kan naq sa' li kutan taachalq wi' li nimla rahilal, ink'a' tooxsach, xb'aan naq xootik'ti'ik re xkolb'al qib' ut xqamuq qib' sa' li b'alaq'il na'leb".

Isaías 28:18 Taasachmanq xwankil li xk'eeb'al eerib' sa' aatin rik'in li kamk, ut li sumwank rik'in li xna'ajeb' li kamenaq taakanaaq chi maak'a' rajb'al. Naq taachalq li nimla rahilal, texputz'i.

Isaías 5:24 Jo' naq li xam naxk'at li k'im ut na'oso'k li k'ix xb'aan li raq'xam, jo'kan ajwi' naq tex'oso'q laa'ex, jo' li che' xq'aak li xxe' ut li ratz'um xhame'k kama' li pojtz'. Xb'aan naq xetz'eqtaana li xchaq'rab' li Qaawa' ut li raatin li Nimajwal Yos, li xSant laj Israel.

Joel 1:12 Xe'chaqikje'k eb' li xtoonal li uub' ut xe'tz'umaje'k eb' li xche'el li iig; jo'kan ajwi' xe'xk'ul chixjunileb' li xche'el li ki'il q'een ut eb' li kala'. Xlaje'chaqik chixjunileb' li che' ut maak'a' chik sahil ch'oolej sa' xyanqeb' li poyanam.

Oseas 13:15 Us ta laj Efraín taa'atz'umaq jo' li pim, taachalq li tiqwal iq' sa' xjayal releb'l saq'e; taawakliiqaq sa' li chaqich'och' ut tixchaqihob'resi chixjunileb' li yu'amha' jo'wi' eb' li releb'aal li ha'. Ut taamaq'e'q chixjunil li xb'ihomal jo' ajwi' jo'nimal jwal chaab'il li wank re.

Apocalipsis 22:1 Chirix chik a'an li ánjel kixk'ut chiwu li xnima'ul li yu'amha', nalemtz'unk jo' li krixtal, na'elk chaq sa' li xnimaqwal k'ojarib'aal li Yos ut li Karneer.

Juan 4:10 Kichaq'ok li Jesus ut kixye: —Wi nakanaw ta li xsimaatan li Yos ut ani li nayehok aawe: «K'e b'ayaq wuk'a», laa'at raj xapatz' aawuk'a' re ut a'an tixk'e raj aawe yo'yookil ha'.

Juan 4:14 a'ut li taa'uk'uq re li ha' tink'e laa'in, maajoq'e chik taachaqiq re: li ha' tink'e laa'in wanq rik'in jo' jun yu'amha' nab'ululnak re li junelik yu'am.

Proverbios 13:14 Li xk'utum li ani wank xna'leb', a'an yu'am ut nakolok chiru li kamk.

Proverbios 14:27 Li naroxloq'i li Qaawa' naxtaw xyu'am chi junelik ut nakole'k chiru li xra'al li kamk.

Ezequiel 13:17-23 "Anaqwan ayu chi aatinak rik'ineb' li ixq aawech tenamitul, li neke'aatinak chi yal xk'a'uxeb' rib', ut ye reheb' sa' ink'ab'a': 18 «Jo'ka'in

naxye li Qaawa': Rahilal chaalel sa' eeb'een li nekexb'alaq'ink reheb' li poyanam rik'in t'ikr nab'ak'mank chi xkux uq'mej ut nekexyiib'ank xt'ikrul li jolomej re xluktesinkil xch'ooleb' chixjunileb'! Laa'ex li nekera'le lintenamit, ma texruhanq chi xkolb'al leeyu'am? 19 Laa'ex yal rik'in jun mooch' chi seb'aad ut jun hab'ok chi wa, nikineek'e sa' xutaan chiru lintenamit; nekek'eheb' chi kamk li ink'a' xk'ulub'eb' kamk, ut nekekol xyu'ameb' li ink'a' xk'ulub'eb' kole'k. Chi jo'kan nekeb'alaq'iheb' lintenamit li neke'paab'ank tik'ti'. 20 «Jo'kan naq laa'in, li Qaawa', ninye chi jo'ka'in: Laa'in nintz'eqtaanaheb' li t'ikr nekeq'unb'esi wi' xch'ooleb' li poyanam jo' tawi' xik'anel xul. Tinkoleb' a'an sa' leeruq' ut tinkanab'eb' chi ach'ab'anb'il eb' li xeluktesi raj. 21 Tinpeji leet'ikr ut tinkol lintenamit sa' leeruq', re naq ink'a' chik teechapeb'. Ut teenaw naq laa'in li Qaawa'. 22 Xb'aan naq xerahob'tesi xch'ooleb' li tiikeb' ru xyu'am rik'in li tik'ti', li maajun wa inb'aanuhom laa'in, ut xek'e xkawil xch'ooleb' li maa'us aj winqeb' chi xb'aanunkil li maa'usilal, re raj naq te'kole'q chiru li tojb'amaak. 23 Jo'kan naq ink'a' chik tex'iloq b'alaq'il moy u chi moko texq'ehinq chik. Laa'in tinkol lintenamit sa' leeruq' ut aran teenaw naq laa'in li Qaawa'»".

Jeremías 21:8 «Ut reheb' li tenamit a'in taaye: Li Qaawa' xye chi jo'ka'in: Anaqwan tink'ut cheru wiib' li b'e, li xb'ehil li yu'am ut li xb'ehil li kamk.

Job 34:22 Maak'a' junaq q'oqyinkil ru na'ajej te'xmuq wi' rib' li neke'b'aanunk maa'usilal.

Salmos 16:10 Xb'aan naq ink'a' tinaakanab' sa' xna'ajeb' li kamenaq, chi moko taak'e chi q'aak laawamiiw.

Salmos 23:4 Us ta tinnume'q chiru q'oqyinkil taq'a, maak'a' k'aru tinxiwa laa'in, xb'aan naq wankat wik'in, at Qaawa'; laab'aar ut laaxuq' neke'xk'ojob' inch'ool.

Salmos 30:4 Laa'at xatkolok we chi xik sa' xna'ajeb' li kamenaq; xak'e wi' chik inyu'am naq ak wankin chiru li kamk.

Salmos 49:16 A'ut li Yos tinxkol chiru xwankil li kamk ut tinixk'am rik'in.

Salmos 56:14 xb'aan naq xakol linyu'am chiru li kamk ut ink'a' xinaakanab' chi t'ane'k, re naq tinb'eeq chawe chawu, sa' li kutan saqenk nak'ehok yu'am.

Salmos 68:21 Li qaYos a'an jun Yos aj kolonel, a'an na'isink qe sa' ruq' li kamk.

Salmos 89:49 Ani yo'yooq chi ink'a' ta toxkamq, chanru taaqakol qib' chiru li kamk?

Salmos 102:20,21 Naq li Qaawa' x'ilok chaq toj sa' li xloq'laj tzuul, toj sa' choxa xk'utzub' chaq rib' rilb'al li ruuchich'och', 21 re rab'inkil xq'oqeb' li wankeb' chi preexil, ut xkolb'aleb' li teneb'anb'il kamk sa' xb'eeneb'.

Salmos 116:8 Xinxkol chiru xwankil li kamk, xchaqihob'resi li xya'al wu ut ink'a' xinxk'e chi t'ane'k.

Proverbios 10:2 Li nab'ihomo'k sa' b'alaq'il maak'a' na'ok wi'; ab'an li tiik xch'ool naxkol li xyu'am.

Isaías 26:19 Eb' laakamenaq te'wanq xyu'am, te'yo'laaq wi' chik li xb'aqel rismaleb'; te'ajq ruheb' ut te'b'ichanq xb'aan xsahil xch'ooleb' jo'k'ihaleb' li wankeb' sa' pojtz'. Xb'aan naq laak'ajob' a'an jun k'ajob' nalementz'unk ru, ut li xna'ajeb' li kamenaq taa'alang.

Juan 5:28,29 "Misachk eech'ool rik'in a'in, xb'aan naq twulaq xq'ehil naq chixjunileb' li wanqeb' sa' muqleb'aal kamenaq te'rab'i xyaab' xkux 29 ut te'elq chaq: li xe'xb'aanu li us te'wakliiq chi yo'yo re li yu'am, ut li xe'xb'aanu li ink'a' us te'wakliiq chi yo'yo re li tojb'amaak.

Juan 10:28 Laa'in nink'e reheb' li junelik yu'am ut maajaruj te'oso'q, ut maa'ani taamaq'oq reheb' sa' wuq'.

Juan 11:43,44 Naq kiraqe'k chi xyeeb'al a'in, kixjap re chi kaw xyaab' xkux: — Lázaro, elen chaq, chan. 44 Ut li kamenaq ki'elk chaq, b'ak'b'ookeb' li roq ruq' rik'in li t'ikr ut lanlo li xnaq' ru chi sut. Kixye li Jesus reheb': —Hitomaq ut kanab'omaq chi b'EEK.

Juan 12:17 Li tenamit li wankeb' chaq rochb'een li Jesus naq kixb'oq laj Lázaro sa' li muqleb'aal ut kixwaklesi chi yo'yo sa' xyanqeb' li kamenaq, yookeb' chi xch'olob'ankil li ke'ril.

Juan 17:2 ut, sa' xk'ab'a' li wankil aak'ehom re sa' xb'eeneb' chixjunil li yo'yookeb', tixk'e taxaq xjunelik yu'am chixjunileb' li xak'eheb' re.

1 Corintios 15:19-26 Wi ta ka'ajwi' cho'q re li yu'am a'in xaqxo li qoyb'enihom sa' xk'ab'a' li Kriist, laa'o raj li q'axal toq'ob'aal qu sa' xyanqeb' chixjunileb' li poyanam! 20 Ab'anan ink'a'! Li Kriist kiwakliik chi yo'yo sa' xyanqeb' li kamenaq jo' xb'een mayej sa' xyanqeb' li xe'xk'uula rib'. 21 Xb'aan naq wi xmaak jun chi winq ki'ok chaq li kamk, jo'kan naq sa' xk'ab'a' ajwi' jun chi winq wank li xwakliikeb' chi yo'yo eb' li kamenaq. 22 Jo' naq chixjunileb' neke'kamk sa' xk'ab'a' laj Adán, jo'kan ajwi' naq chixjunileb' te'wanq wi' chik xyu'am sa' xk'ab'a' li Kriist. 23 Ab'anan moko jun wakliikeb' ta, naq te'wakliiq chaq: xb'enwa li Kriist, a'an li xb'een mayej; moqon chik eb' li re li Kriist, sa' li xnimal xk'ulunik. 24 Chirix chik a'an aka' li roso'jik li ruuchich'och' naq li Kriist tixq'axtesi li x'awab'ejihom sa' ruq' li Yos Yuwa'b'ej, naq akaq xjuk'i chixjunil li wankilal, taqlank ut awab'ejilal. 25 Li Kriist tento taa'awab'ejinq toj reetal tixk'eheb' rub'el roq chixjunileb' li xik' neke'ilok re. 26 Li taajuk'eeq xwankil sa' roso'jik, a'an li kamk.

2 Corintios 1:9,10 Relik chi yaal naq ak xteneb'aak li kamk sa' qab'een, ab'anan us ajwi' naq xqak'ul chi jo'kan re naq ink'a' xqakawu qach'ool qajunes qib', rik'in b'an li Yos li nawaklesink chi yo'yo eb' li kamenaq. 10 A'an xkolok chaq qe chiru li nimla rahilal a'an ut toj yooq chi qakolb'al. A'an kaw wi' li qach'ool naq toj yooq chi qakolb'al,

2 Corintios 3:6 a'an xooxkawresi cho'q aj k'anjel chiru jun Ak' Sumwank, maawa' re li tz'iib'anb'il chiru pek, re b'an li Musiq'ej. Xb'aan naq li tz'iib'anb'il nakamsink, ut li Musiq'ej nak'ehok yu'am.

Colosenses 1:21,22 Junxil laa'ex najtex chaq rik'in li Yos ut xik' nekeril A'an, xb'aan leek'a'uxl ut leeyib' aj b'aanuhom. 22 A'ut anaqwan li Yos xexk'am wi' chik sa' rusilal sa' xk'ab'a' li xkamik li xch'och'el sululel li Kriist, re eexaqab'ankil chiru sa' santilal, chi maak'a'aq eemuxul ut eeq'usb'al.

Hebreos 2:9 ab'an li kub'enaq kach'inaq xwankil chiruheb' li ánjel, a' li Jesus, ak naqil naq k'eeb'il xloq'al ut xwankil cho'q xq'ajkamunkil, xb'aan naq kixk'ul xrahilal li kamk. Jo'kan naq, sa' xk'ab'a' xnimal ruxtaan li Yos, li kamk kixk'ul, a'an usilal cho'q reheb' chixjunil.

Hebreos 2:14,15 Jo'kan utan, kama' naq eb' li alal k'ajolb'ej neke'tz'aqonk sa' junaj chi tz'ejwalej ut kik'elej, jo'kan ajwi' li Jesus kitz'aqonk rik'ineb' xch'och'el xsululel re xsachb'al xwankil laj eechal re li kamk, a' laj tza, sa' xk'ab'a' li xkamik, 15 jo' ajwi' re rach'ab'ankileb' jo'k'ihal li wankeb' chi b'ak'b'o junelik xb'aan xxiweb' chiru li kamk.

Hebreos 11:5 Sa' xk'ab'a' li xpaab'aal laj Enok kik'ame'k taqe'q chi ink'a' kixyal li kamk; ut ink'a' chik kitawmank xb'aan naq kik'ame'k xb'aan li Yos. Ak rub'elaj li xq'axonik, li Santil Hu naxye chi yaal naq li Yos sa sa' xch'ool rik'in.

1 Pedro 3:18 Xb'aan naq li Kriist, jun wa ajwi' kikamk re xtojb'al rix li maak, li tiik xch'ool chirixeb' li ink'a' tiikeb' xch'ool, re qak'amb'al rik'in li Yos. Li Kriist kikamsiik sa' li xjunxaqalil, ab'an kiyoob'tesiik sa' musiq'ejil yu'am.

2 Pedro 1:3 Li xnimal xwankil li Kriist kixsi qe chixjunil li nak'anjelak sa' li qayu'am ut sa' li qapaab'aal, sa' xk'ab'a' xnawb'al ru li Yos li kib'oqok chaq qe rik'in li xloq'al ut li rusilal.

1 Juan 3:14 Laa'o naqanaw chi us naq xoo'elk sa' li kamk ut xooq'axonk sa' li yu'am, xb'aan naq naqaraheb' li qas qiitz'in. Ani ink'a' narahok, nakanaak sa' li kamk.

1 Juan 5:11 Ut a'an a'in li xch'olob'ahom li Yos: naq xk'e qe li junelik yu'am ut li yu'am a'in wank rik'in li Ralal.

Apocalipsis 21:6 Ut kixye we: "Ak xyaalo'k. Laa'in li Alfa ut li Omega, li xtiklajik ut li roso'jik. Ani taachaqiq re, tink'e chi uk'ak chi maatan sa' li yo'leb'aal ha' re li yu'am.